

四庫全書

集部

欽定四庫全書

集部

東里續集卷三十八

詳校官檢討_臣羅國俊

中書_臣劉源溥覆勘

總校官進士_臣楊懋珩

校對官中書_臣范鏊

謄錄舉人_臣朱錫彤

欽定四庫全書

東里續集卷三十七

明 楊士奇 撰

墓誌銘

刑部俞主事墓誌銘

刑部主事俞得濟公廣卒其孤希俊將奉柩歸葬處州之遂昌以刑部主事周得琳所具事狀請銘公廣嘗從余翰林十餘年銘不得辭俞之先居睦州宋季有仕遂昌者因家焉而自曾大父以下皆不仕父則榮母毛氏

得濟其諱公廣字也幼孤長克勵於學涉獵既博矣從先生長者習詩律永樂六年詔翰林集四方儒學之士纂脩永樂大典及能書士職繕寫公廣以能書薦書成被賜賚詔就翰林益進其藝十八年擢兵科給事中勤慎詳敏克舉其職坐累出為邯鄲縣丞當要道過使客百費取給於縣者日輻輳公廣為之有方民不困而事集尤以寬厚得民心洪熙改元召還為刑部照磨尚書給事中皆言其才陞刑部廣西清吏司主事盡心獄中

無冤滯者宣德五年有司援例奏贈其父承德郎刑部
廣西清吏司主事封其母太安人妻李安人制可命未
下而公廣以疾卒是年七月十五日也享年五十有一
子男二長希俊次希傑女三長者歸吳宗智餘在室孫
男女各二公廣居官不為崖岸不失持守遇事不平直
發之不為苟默雖數以是召怨咎不悔其才可用且未
老而遽卒惜也銘曰

才與時際兮宜厥施兮奄長逝兮孰所致兮

國子助教邵先生墓誌銘

北京國子監助教邵先生卒其子壇均介吾友翰林檢討許子謨先生求為墓銘余數過監學重邵先生淳厚端雅蓋良師範也許先生又言壇均博於孝行有足尚者遂受事狀為叙而銘之叙曰邵世家福州之懷安先生之曾大父野雲大父復真父彥英皆隱居不仕母劉宋侍御史文濟之孫先生諱煇字時晦幼喪父母賢必欲成其學問先生亦蚤克自勵遂入邑庠受業明經師

退而就其同門之賢者相講論切磋令下調閭右實京
師先生家在行居京師踰年援例免歸而家益貧復入
邑庠卒業永樂丙戌登進士第為翰林庶吉士預脩永
樂大典勤於職務同輩服其能時寓應天府學坐家人
弗戒火延燬廟學謫戍邊者十五年處患難泰然不以
戚其中用薦召還除國子助教其學講貫有素其誨人
盡誠學者皆樂歸之平素履行清謹重信義其友兵部
郎中黃安卒於北京無强有力親戚在側先生為治歛

舍畢而遣子壇走數千里歸其柩及其家於閩其行槩
類此在太學將九年嘗賜勅命授脩職佐郎而卒於宣
德七年八月六日享年七十有二其配錢塘郭氏安道
闕子生男女各二男即壇均女蚤喪其長者次嫁進士
廖伯牛葬以卒之明年某月日墓在其邑某鄉某原銘
曰

國有成均賢士所關必有師氏乃成衆賢正學篤行由
躬率先維師其難匪今則然維時晦甫茂敷蹈履授業

解感式振厥士既壽考終而藏在此銘以昭之亦慰孝子

嚴迪德壽藏墓誌銘

吾邑嚴君迪德馳書北京謂余有生者必有死吾今年七十有五即旦夕獲全歸幸矣雖吾生甚貧然顛顛持其身不敢踰越誠懼辱吾之先人亦欲吾之子若孫皆不敢辱也已豫營一丘矣竊歎近世死者其子孫往往鉅資豐幣請於縉紳大夫求誌其葬縉紳大夫或未知

察也甚者文跖為孔飾市僧為道德貽世譏誚雖吾之
子弱且窶不足以動時貴人亦非吾所願也子於人善
率紀實如吾意然子之年加於吾矣盍及今無恙豫為
誌一言亦及吾之見也余家與嚴世婚姻迪德於余為
從表叔余仕於兩京四十年前始一歸鄉里親交物
故殆盡迪德歸然雖老而健能時時過我今別又三年
恒往來予懷有託其何以辭嚴故西昌文獻名家宋館
閣校勘肅稱朴山先生其五世祖也父從禮洪武中國

子學正剛毅端方三子迪德其季也名福真涉獵學問
存心端厚而志行堅確內博孝友愛兄之子如子而嚴
其訓有弗率者畧而不校接人意度和裕言必當理安
貧守義非其所當得一芥不取親戚交游有急赴之恐
後間有挾勢來侵者迪德絕口未嘗言亦未嘗一語干
人以私自縣令丞及邑之賢士君子皆禮遇之布衣蔬
食居常休休自得也論今西昌善士非迪德其誰歟嗚
呼前輩流風餘韻遠矣後生薄俗馳騁世利為雄長彼

固不知重迪德然率遽起遽仆忽焉如浮雲飛鳥之過
目若迪德蒼顏皓首既壽而康履貞居安自少壯至老
坦坦如一日謂非人之所自致乎迪德娶宋氏先卒子
男一顯女四其一嫁國子學錄梁稟餘皆歸士族迪德
之壽及子若孫皆未可涯余既述其行之槩又銘其藏
俟屬續既刻之銘曰

盈則有虧榮則有悴芒芒天壤其孰非寄陶有自輓杜
有自誌超哉達人千載一致

葉侍郎墓誌銘

宣德元年朝廷以蘇松常鎮嘉湖諸郡姦吏土豪肆為貪虐以毒細民久而愈甚特降璽書命大理卿胡槩叅政葉春巡歷訪察務去惡以寧善後又益以錦衣衛指揮任啟監察御史賴瑛槩等奉命所至秉公推明行之以果無所屈撓於是暴者以仆困者以起橫者以折弱者以立上之澤下流下之隱上達數郡之內氛翳廓清畎畝閭閻咸有生氣時事之裁制一董於胡然在葉之

鄉邦知之素明而行之無私葉蓋有助焉竣事還奏上
嘉之數人者皆進官春進刑部右侍郎歲中得風疾上
命太醫視療久未瘳奏乞歸從之後竟不起八年六月
十八日也春字景暘世家嘉興之海鹽其先本林氏考
諱祥幼喪父母鞠於表兄葉某遂冒葉氏景暘幼警敏
知學有才識洪武中舉自邑吏歷事吏部者六年永樂
初禮部尚書李志剛知其通練能謹薦於朝擢主客清
吏司主事階承事郎以勤敏周密為上官所重三年陞

本部郎中階奉議大夫進奉政大夫丁內艱去服闋仍
舊職三考以績最陞兩淮都轉鹽運使歲餘丁外艱服
闋改福建布政司右叅政仁廟嗣位來朝遂與廣西右
布政使周幹同被璽書巡視應天鎮江蘇常湖松杭州
嘉興八郡訪民利害而建革之歲餘歸今上嗣位景暘
復詣蘇常諸郡者再中改四川布政司右叅政未行又
二年而拜侍郎之命又二年而卒春秋六十有四娶吳
子男三長懋次林次森女一適闕孫男七觀鼎昇璿璣

王衡其葬在邑之大易鄉平

闕

懋奉事狀介

翰林庶吉士趙智來拜乞

闕

辭而不獲乃叙而銘之

銘曰

仕歷中外才際時和厚靖惠敦執持恭勤劼毖勵職司
行於鄉邦公弗私登貳六官荷眷知六十考終樂全歸
來世有考視刻辭

宣郎中墓誌銘

宣彥初諱嗣宗蘇之嘉定人永樂三年詔郡縣舉楷書

士蘇舉彥初既至奉命從中書舍人書誥勅無幾簡從事翰林諸學士皆重之歲餘坐累謫交趾時尚書東萊黃公總交趾布政司按察司一見彥初知其才良寘諸左右任之事深得其助益禮遇日厚交趾九年始歸復被召入翰林遂授中書舍人又簡文淵閣專書內制二十二年扈從北征既還丁祖母憂洪熙元年驛召至復其職賜勅命贈其考子朝中書舍人妣唐孺人贈其故妻譚封繼室范皆孺人宣德元年扈從東征還進吏部

驗封員外郎食其祿仍從事文淵閣三十五年皆扈從
巡邊兩朝實錄成以繕寫勞賜襲衣文綺表裏白金進
本司郎中祿秩仍從事文淵閣賜誥命進其考郎中妣
宜人乃進其故妻繼室皆宜人六年夏彥初得疾醫藥
久不効是年十月十三日卒享年五十有二彥初甫三
歲祖均德及父母俱喪鞠於祖母葛稍長日悲念父母
不絕而事祖母甚孝祖母躬勤織紵資其學彥初亦克
自勵駸駸有進益且卓然有立志鄉老長皆奇之謂宣

氏有後言於邑大夫舉為區長非其志也固辭會楷書
命下郡守曰莫踰宣彥初矣遂送詣京師彥初在翰林
最久恭慎小心克勤旦暮未嘗以私廢公處同列溫而
有讓衆或臨事憚勞費至出語相侵彥初獨怡然不作
於詞氣而請自任士論以是多之為人疏達誠實行已
端重不肯苟且雖家無餘貲遇人窘急倉猝能致義助
故其病也卿大夫之賢者屢造視之及不起咸往哭弔
可以知其人矣子男三謙益泰皆幼女四黃暄陳述侯

寬其壻也一尚幼其卒之明年某月陳述奉喪歸葬於鄉其友黃養正具事狀求為墓銘彥初余所心愛重者為之銘曰

和而莊坦而慤處事平執事恪履險夷一恬漠嗟彥初不復作

故嘉議大夫刑部右侍郎段君墓誌銘

宣德九年二月二十九日刑部右侍郎段君卒於南京家素貧僉都御史吳君敏德既經紀喪事禮部尚書胡

公源潔以聞上為悼歎賜祭命有司營葬於是吳君使人北京需葬銘而胡公以屬士奇嗚呼段君者世所謂仁人君子也又士奇素所交游士奇宜銘按國子司業陳君光世狀段之先居南康之建昌世業儒其曾祖營田郎中篤修徙吳中父志清又徙常州之武進母葉氏君諱民字時舉自幼溫重穎敏喜學且其父母惟一子篤意教之故德器蚤成登永樂甲申進士第為翰林庶吉士時太宗皇帝命禮部翰林院准天經之數選曾

榮等二十八人就文淵閣盡出中秘書使進其業旦暮
給大官饌又月給膏火之資蓋期之於大用而君與焉
君祇體上意益勵弗懈而文學大進與脩永樂大典丁
內艱去服闋除刑部山東清吏司主事授承直郎蒞官
廉慎而明敏克勤恒存哀矜惻怛之心處疑獄必歸於
厚麗辟者咸以得君為幸踰年扈從赴北京召脩四書
五經及性理大全書書成被重賜復還刑部陞郎中益
精獄議尤為尚書所重凡大獄必咨君剖奏章必歷君

閱乃上在刑部八年山東妖婦唐賽兒作亂三司官以
縱寇誅詔廷臣簡代者共推舉君數人授君山東布政
司叅政同舉中有畏難者君曰竭誠以共吾職耳何足
計利害哉下車敷宣德意整飭紀綱綏撫殘氓剗革宿
弊政理一新吏民悅戴居三年召同考禮部會試士論
服其衡鑑又三年召赴闕命以本官署戶部右侍郎之
南京是時車駕在北京久南京諸司習於玩愒任錢穀
刑名者其務叢脞尤號不治君至躬勤率之莫敢或違

始若扞格已而服從咸脩其職明年實授本部右侍郎
又明年改刑部其振起作新一如戶部罪人聞君至皆
相慶於獄伸抑疏滯旬浹之間聲譽用彰三年以績最
賜誥授嘉議大夫贈其祖若考皆嘉議大夫刑部右侍
郎祖妣李淑人封其母太淑人妻盛淑人初為叅政考
滿當得誥言於朝願推以封母從之至是母年將九十
得封者再人皆榮之君忽得寒疾數日小瘥矣將出視
事左右謂未可以風曰數百人困坐獄中翹跂待我奈

何可自供哉強出三日疾復作遂亟有問之者答曰不能報上恩矣如老母何言已遂卒君性至孝初為庶吉士得祿即迎父母就養京師父沒後所歷官未嘗不奉母以行而曲盡愛敬襟宇清明坦夷表裏一致喜怒不形聲色當官任事惟義所在不苟遜避與人交久而信卒之日其官屬臨哭皆哀南京卿大夫之賢者皆走弔哭北京自師傅六卿以下咸寓奠祭君春秋五十有九其子男四寔宏安寧孫男二璇璣女三其葬以卒之歲

某月某日附武進先塋之次銘曰

仁以及民義以行身其履坦坦其存溫溫我懷若人於

古多有嗚呼時舉於今曷少亦既乘時曷不永年

闕

斯而獨其親凡今之人

闕

君子

闕

賢

友

故奉議大夫禮部儀制郎中龐君墓誌銘

禮部儀制郎中龐叙卒於官其子珙將奉柩歸葬吉水
以中書舍人宋懷所述事狀乞著墓誌銘余今年七十

有五益倦文事然念龐氏父子皆從余翰林久不忍以
辭龐之先家袁之分宜十一世祖稱雲軒者始徙吉水
仁壽鄉傳其後資產日裕六世至季安傾家從文丞相
舉義勤王又三世至希凱為南雄路沙鎮巡檢叙曾祖
也祖弱翁龍泉縣尹父文芳好學務義母劉有賢德叙
字明叙蚤喪父賴母長育少從明師學永樂初詔郡縣
舉善書士隸兩制書制勅簡其尤者十數人從學士
於內閣而出禁中古法書名蹟俾進其能明叙與焉時

朝廷四方之務方殷命令多以璽書十數人者雖鮮暇
稍暇輒自進弗懈咸駸駸有造詣矣先是明叙父嘗傳
兵籍既卒無他丁男有司言明叙應充伍時仁廟監國
南京索明叙所習書覽之嘉獎命削兵籍十年除中書
舍人授從仕郎自是車駕巡狩皆與扈從三考奏寢復
職洪熙初賜誥命進徵仕郎贈其父中書舍人封母太
孺人賜誥及鈔歸省兩朝實錄成以繕寫勞賜銀鈔襲
衣丁內艱服闋仍闕

考奏最陞儀制清吏司郎

中授奉議大夫食其祿仍從事內閣宣廟實錄成以繕
寫勞賜銀幣加四品祿始專職儀制司八閱月而卒自
入館閣以來三十餘年敬慎如一日純厚謙和不見崖
岸口未嘗及人過失其度能容有誣其過及加之厲辭
色者怡然受之不校以是先生長者及其同官皆重之
無間言云家居事親孝親沒哀慕不衰睦族姍患難率
扶持之朋友有急必赴恤僮奴如子公退時共賓客觴
咏為樂所為詩有淇園藁其生洪武丁巳三月二日其

卒正統戊午十二月二十八日享年六十有二娶黃氏
封孺人子男四長瑒次珙亦以善書授試中書舍人父
子同朝縉紳榮之次猷次瑛女二長適黃次適周孫男
若干朋叙之葬以卒之明年某月日墓在某原銘曰
弗騁以角弗巧以琢而任其樸噫嘻其樂

衛孟敬墓誌銘

衛世家河東系出漢御史大夫綰歷晉唐及宋仕籍不
乏金人入寇徙河南歸德之穀孰至元有曰慶甫好施

予生伯升瑰瑋有材畧以軍功積官至萬戶孟敬之大
父父也孟敬諱整為人敦愿內而事親敬長外而處戚
姻鄉鄰舉無違禮以行義訓子孫以勤儉致饒裕而好
施予有乃祖之風焉永樂壬寅五月得疾闕日召諸子
申論惇睦之道又遺訓長子之在官者以必盡臣節言
訖而終是月五日也享年五十有八娶畢氏子男六鎮
欽祥清鏞鐸鎮中鄉試為大名縣學訓導今陞左春坊
司諫女六祖榮郭亮武盛劉正高林其壻也其一在室

孫男四俊又聰敏女二諸子以卒之歲某月某日奉葬于其鄉南原先壠之次先事鎮以翰林編脩徐永達所狀事行請銘余於鎮有同寮之誼不得辭為叙而銘之

銘曰

端其存厚其施以全其歸以昌其世

陳處士墓誌銘

處士姓陳氏諱霖字士悅陳氏其先居金陵五代之際大理評事諱暉者始居泰和世業儒至宋而仕官科第

其盛彬及從子午皆理宗朝進士彬官至提點刑獄午
國子監簿監簿文丞相進士時座主後公過泰和為新
其居第至今鄉里誇道為榮處士五世祖也祖存道元
安遠縣學教諭父煥章母曾氏繼蕭氏處士兄弟四人
其仲處士也為人端厚和易自少喜學問安成劉雲章
先生嘗教授其鄉處士與其兄士瞻從之學兄弟皆為
先生所重駸駸有造詣矣無幾士瞻舉進士去後為興
寧縣主簿父已老二弟皆幼而處士始弱冠凡公府徭

賦及家之祭祀賓客寒暑朝夕所出皆治于處士而皆當其父之意平居孝事父母及其繼母友於兄弟愛弟與子一督之學士瞻嘗坐謫遠外嫂鄧早沒遺三女及劉氏妹夫婦皆沒遺二女皆鞠於處士既長為擇壻備禮而嫁之行闕擇義鄉人服其公有爭訟率往求直而樂於恬靜嘗闕省兄至興寧留旬日而去縣人莫有知者及弟士啟子禮先後登第士啟自禮部郎中陞山東叅政禮為思南知府人皆為陳氏榮而處士意澹然入

則與士瞻相怡愉出則陶其趣於山水之間蓋其自視
舉無以易此樂也晚喜寫墨竹日為之不厭人因其所
自號稱悅巖居士云永樂丙申十一月二十四日卒享
年六十有三娶戴氏故儒家有婦德先卒繼曾氏子男
五長禮今為臨安知府次禧舉鄉貢為辰州府學訓導
次祚為士啟後次祊女三長嫁羅以智次嫁蕭德莊次
許嫁郭暉孫男一肇女四處士之葬也以卒之又明年
二月二十四日葬在山槎鄉鵠鳩岡先塋之側而未有

銘先宜人處士族姑余其外弟也於是禮以翰林脩撰
曾鶴齡所述事狀屬余銘銘曰

焜焜其先駢榮累芬濟濟其承繩武續聞嗟士悅甫潛
彼遐陬孝士于行匪于顯幽喬喬珠林爰託我居擷芳
挹清優游怡愉白髮歸全其藏有墳春秋雨露來來子
孫

左處士墓誌銘

監察御史南城左瑞永樂癸卯三月二十六日喪其父

處士公奉中書舍人同邑章文昭所述處士行狀介刑
部員外郎吾郡周恂如求銘其墓按狀左氏世家盱南
城元季徙麻源三谷至處士又徙郡城之西曾祖諱欣
祖諱明叔元闕公府從事父諱彬卿平樂州學正母甯
氏處士諱謙字彥彰從父進士友信無子以父命為之
後天資明敏自少喜學問不煩程督於經史諸書過目
輒能記誦不忘長益博通百家貫穿古今遠有造詣而
事其父母及所後父母一於孝所後母鄭氏久病氣絕

已三日獨胸次微溫衆環視不見生意欲舉歛處士不可力求醫療竟甦母恒言微孝子吾死久矣父母沒皆哀毀而葬祭以禮友於兄弟慎擇交友而敬久不衰急於義舉未嘗與人較曲直而鄉人有持曲直不能平必就而質之守令數薦起之皆以親老辭然教其子必在於事親瑞登第歸省諭之曰由祖宗積累致汝有今日如或一毫於國事不能盡忠忝爾祖矣其終勉之平居一由儒者之道釋老巫覡之流未嘗及門恒不忘三谷

山水之勝自號三谷居士春秋八十有六而卒娶劉氏
繼周氏俱有賢行先卒子男四英猷傑瑞瑞永樂十六
年進士任浙江道監察御史孫男七紹宗益宗顯宗超
宗興宗述宗輝宗女二曾孫男一愈處士之葬以卒之
歲某月日其墓在邑某鄉某原銘曰

左氏所出自齊公族丘明素臣郢游聖門名漢者雄晉
曰太冲在唐曰震代有耀宗厥來徙盱益蕃以昌累善
積仁顯聞鄉邦學士繩繩逮彥彰甫欽厥攸行靜言幽

處卷而弗施以遺厥後惟彥彰甫沒且弗朽

胡處士墓誌銘

永樂十八年十月二十日豐城處士胡宗仁卒享年六十有三將以明年某日葬其邑某鄉某原胡之先出成都有諱諒者唐貞元中與韓愈歐陽詹同登第其長子讓僉判撫州因家崇仁讓次子寂又徙豐城之厚郭遂為豐城人至諱叔恭諱孟寅處士大父父也孟寅六子其二處士也諱某天資質實穎敏好學問居家有考

友之行於處族姻朋友能盡其道以仁恕為行己之本
詩禮為傳家之器其善人者歟娶鄒氏子男四軫輓軌
軾軾先卒女三徐仲殷李大猷周某其壻也孫男四鍾
鑑鐸釗女三軫永樂乙未進士授兵部車駕清吏司主
事永璧之操有聞縉紳間知者以為處士之教也於是
軫奔訃將歸齋國子助教徐疇所狀處士世出行實介
司諫曹曼齡請銘其墓余雖前未識處士觀其子可以
知之矧有如助教君所述者乎銘曰

縕仁好善而蹈義兮栖遲丘園樂洩洩兮式先大之德
厥嗣兮

楊宗榮墓誌銘

處州之松陽楊宗榮年七十卒既葬矣後三十有三年
其孫巨容以某官某所述世出行義介前國子典簿葉
允元請銘其墓按楊氏系出漢太尉其後子孫益衆散
徙江淮閩浙間至宋有諱某者為金華主簿其子信為
衢州教授始來居松陽歷若干世至安道宗榮父也母

葉氏宗榮自幼喜讀書為詩家居敦孝友處宗戚鄉鄰
恒輟有餘賑匱乏及葬其死之無歸者攻醫有疾率濟
之善藥尤以諒直為鄉人所服縣嘗舉耆老資以集事
晚好黃老清靜之道幅巾逍遙泉石之間有以自得卒
以洪武己巳五月十三日娶葉氏子男二景和人傑孫
男四巨容巨信久章久祥巨容今為長葛知縣孫女二
銘曰

力善而施弗達以試澹乎以愉尚厥志後有考之此其

識

洪珙夫墓誌銘

青田洪珙夫既卒而葬矣其孫廷信奉禮部郎中葉仕
寧所述世系事行介前國子監典簿葉允源來求墓銘
洪之先居番禺系出宋贈太師魏國忠宣公皓皓之孫
曰純為曹屬於括始自番徙括居青田之鴈衢珙夫八
世祖也高祖秉哲元閩海翼上千戶曾祖疇脩德樂善
所交多名賢石塘胡先生嘗賦其所居延桂樓趙文敏

公嘗記其所創太清宮白雲菴而皆文敏所書云祖鉉
考宗江俱畜德不仕妣張氏珅夫諱某字尹武珅夫其
別字也儀觀偉然事親能孝生養死祭一致其誠於睦
族人處鄉人皆得其意捐貲以賑貧乏無告者不間於
識不識珅夫讀書通古今有材畧元季尚少郡辟司倉
不屑就天兵下處州總帥聞其名召主給饌井井不紊
帥數稱其才已而免歸皇明既混一海宇則命其弟出
仕珅夫留家居治田園新居室名其藏息之軒曰清逸

儒生君子與之游者多為之賦客至焚香鳴琴觴詠為
樂既老葛巾藜杖攜朋徒及其諸孫日徜徉山林泉石
之間雖曠焉無所係于其心而謹循憲度不少縱以田
賦屢長萬石區率先集事而尤以公平而民悅服雖不
仕而所以刑於家施於鄉者人未嘗不以仕望之也其
卒以洪武己卯十月二十五日其壽七十有七其葬在
訪川吳岡之原其配葉氏其子某某其孫三庭信庭
質庭翰其曾孫男二克鎮克鏹女一銘曰

有韞其中器之良恬澹愉佚履幽貞鬱乎斯丘歸永寧

東里續集卷三十七

欽定四庫全書

東里續集卷三十八

明 楊士奇 撰

墓誌銘

禮部左侍郎李公墓誌銘

宣德七年十月十五日禮部左侍郎致仕李公卒於家
訃聞上遣官賜祭師傅六卿而下皆往弔祭卜明年某
月某日葬某縣某鄉某原其孤栗以治命奉翰林侍讀
苗君衷所述事狀來拜請銘禮部尚書毗陵胡公申為



之言予與李公同事三聖凡三十年乃按狀序而銘之
李之先居平陽之臨汾大父諱仲智父諱師魯元季隨
兄希賢宦游燕都遂占籍宛平縣而公生焉公諱嘉字
允堅天資凝重不妄言笑自幼卓卓有立志事親孝稍
長縣大夫選邑學弟子員前大學士董公倫時為學教
諭公從受業旦暮自策勵所授書率誦讀數百過四書
注釋雖老不忘已而念家貧親老丐罷歸侍養為師者
初惜其去遂獻詩達意其辭懇切師憫而從之後選奉

祠所禮生事太宗文皇帝於藩邸敬恭祀事恒致其誠
無幾丁父憂哀毀動人終喪不飲酒食肉覽父手澤未
嘗不流涕而養母愛敬兼盡初世父希賢死於兵無子
倉猝藁葬公念及輒悲竟卜吉壤備禮而葬焉文皇帝
起北平預效守城勞時南兵逼城城外民有負母入城
無所依者公避舍以處之且食之粟民母子得全於急
義率類此內難平錄守城功名至南京有司奏授鴻臚
寺序班數月上親擢為通政司叅議且面諭之曰以爾

誠實故擢實要地必勤必慎母忝朕命公益盡心乃職
一日奏事畢自陳臣有老母在鄉里無他兄弟侍側願
躬迎母就祿養從之既至時初建北京奉命董運木之
役於河南殫其智慮夙夜不懈後喪母哀毀如喪父詔
賜棺及驛舟歸其喪服闋仍前職遂扈從北狩自是巡
狩皆預扈從後坐累左遷鴻臚寺丞仁廟御極陞左通
政遂陞通政使又坐累左遷未行上嗣大統復通政使
改北京行部侍郎念其老不堪繁務又改禮部侍郎公

雖精力日衰猶勉強事事未嘗少間再歲以疾聞特賜
勅褒諭命致仕又數日不起享年七十公持身端謹一
芥不苟取予剛方嚴毅人不得干以私其任職細務必
親故所歷寡合終不為變治家整肅教子孫必務學而
閒暇道說國初以來北京名賢故老流風餘韻娓娓不
窮聽者忘倦蓋自是能知而言者亦鮮矣其歷任散官
自將仕佐郎積至通議大夫以公貴再追封二代大父
父皆金通議大夫禮部左侍郎大母吳母榮皆淑人追

封故妻蔡封繼室趙皆淑人子男四栗直剛簡女二孫
男四震謙泰巽銘曰

嗚呼李公有孝有守遭逢龍興陟帝左右剛毅之資自
信弗疑顓顓以持莫之或移納言之司宗伯之貳歷年
三十始終一致白髮蒼顏鞠躬竭誠三聖在上天鑒孔
明奎章龍文奉勅歸第象笏朱衣里閭迓拜從容優游
以壽考終綸音及門寵光隆隆嗚呼李公生死榮哀勒
銘其藏永示後來

翰林庶吉士湯如川墓誌銘

永樂四年三月庚戌翰林庶吉士湯流如川歿于京師
其友曾與賢為治喪歛已楊士奇將述其平生為墓中
之銘以授其弟如壝使歸葬焉屬隣舍夜災延燬如川
舍及棺如壝拾其遺骨而歸嗚呼如川何以得此哉其
平生所為宜壽宜備諸福乃四十以卒而又遭遇身後
之災造物者於如川何如也世之不為如川者或至於
期頤即不至亦不見其身後如此者造物者之意何如

哉如川世家泰和之甘溪曾祖某祖某父均義母李氏如川溫雅易直事父母及撫諸弟皆能悅其意處朋友必引之於道臨事務當大體永樂癸未以詩經領鄉薦

明年登第賜進士出身

闕

聞其材行請於

闕

為

給事中會

闕

新儒術將有

闕

風勵天下乃擇進士英

敏者得二十八人盡出衆秘書俾進學於文淵閣期之於古人如川在焉如川懼無以稱上意蚤夜勉勉不息而學益進明年季弟如箴來省得疾卒如川哭之數日

亦得疾以卒朝之士君子聞其卒皆相與悼歎以為不可復得嗚呼如川者真不可復得哉其仁厚可以長民明公可以持法執守可以勵俗通練可以集事可謂才德兼有者矣將用某月日葬某山某原時二親皆垂白無恙而連哭二子此宜何如其情也娶某氏子男三某某某女二余生先如川一年交之最厚而最深也來京師相聚甫在歲方資之為輔豈謂一旦遽失吾益友哉乃忍哀而銘之銘曰

為器之成宜而動也時弗達于施而止於斯而止於斯
又孰為之災孰之攸司曷其測知我銘于茲以紓我思
以慰其父母之悲

陳孟京墓誌銘

孟京諱昌姓陳氏以字行登永樂四年進士第授翰林
庶吉士七年五月二十三日卒於官陳故泰和簪纓家
五代有諱暉者始由金陵來徙至孟京凡若干世自宋
建炎中有諱千齡者始登進士第至孟京凡十有四人

其他選鄉貢舉明經才行不可勝數載郡縣志與其家
乘甚悉孟京少孤貧苦嗜學旦暮自任負以養其祖與
其母手一卷未嘗釋也遇明儒碩師輒挾所業往請益
弱冠稍出教授愈自刻勵口誦手錄窮晝夜不廢一時
朋儕強記多識者不能及也永樂元年中江西鄉試四
年會試禮部中前列廷試在第二甲初族兄士啟永樂
二年試中第二甲賜進士出身授翰林庶吉士至是孟
京與從兄孟潔皆賜進士出身皆授此官陳氏兄弟之

盛人以為榮時朝廷廣召文學之士纂脩永樂大典孟
京與編校晨入晚出未嘗以私廢其博達明審老師宿
儒多讓之性孝友家素貧幸仕得祿而薄甘旨未嘗充
其母甚樂也愛其弟恒約己以裕之卒之時家徒四壁
顧其妻曰死生常道勿戚戚身後事其在諸兄汝惟善
視兩兒不可令斷絕讀書種子耳不一言及他事嗚呼
此亦可以觀其志矣卒時年三十有六曾祖主一妣倪
氏祖以靜妣曾氏考孔武母蕭氏娶劉子男二中九歲

元斗七歲女一既卒士啟孟潔為治棺殮買舟還其喪
與其妻子先宜人以靜先生之子余其外兄故為述平
生大槩為墓銘使歸葬焉銘曰

力學植身屢空弗知始達而暢曾不幾時嗟乎孟京遽
止於斯行邁崎嶇而難平夷嗟乎孟京匪命之罹

趙進誠墓誌銘

華嚴有豁達賢智之士曰趙進誠自少慷慨抱氣節明
經博學通當世之務嘗欲有所施見於時屬元季政亂

不可有為遂括囊不出日以養親為樂方國珍竊據溫
台諸郡是時蟻附之徒率皆氣焰灼灼猝起旦夕間進
誠獨曰是何異趨膏火以自得者吾行見其斃其又可
效乎即奉親走匿山澤不與世接也聞太祖皇帝定鼎
金陵發兵弔伐于四方忻然舉手加額曰聖人出天下
自此大定矣國家既平定方氏浙水東之地悉歸職方
浩然有願仕之志冀一得發施其所負畜然遂疾作不
及行而卒洪武辛亥某月日也年四十有九進誠諱友

諒其先宋南渡時迪功郎諱某始自汴徙黃巖後至諱
某者其曾祖也祖諱某考諱居敬妣某氏進誠穎悟過
人少喜為文章平居事親睦族姻賑貧乏皆以為分內
事不肯苟且遷就徇人終其身不能一日如志以見諸
用非其命也夫娶黃氏子男五季寧季享季達皆蚤卒
季鼎今自福寧縣學教諭陞國子監典籍方嚮用於時
季桓女一適盧仲茂孫男七人進誠卒後二十一年諸
子始克奉葬於縣嚴山之陽又十有九年為永樂九年

季鼎奉狀來求文銘墓余考其志行及其時命有可悲者為之銘曰

士懷璧兮靡玷缺庶薦于時兮命遽闕銘以昭之兮永弗滅

羅仲深墓誌銘

余友曾與賢登永樂甲申進士第為翰林庶吉士又二年其女弟之夫羅仲深繼登第與與賢同官同舍踰年與賢卒又明年仲深女兄之子曾用常亦舉進士來京

師居止依舅氏未幾用常又卒仲深連經紀兩喪於客
外傷其中情鬱抑無聊日益病猶強出事事後用常卒
之數日亦不起矣悲夫與賢醇厚易直仲深溫潤簡靜
用常雋爽端確皆吾邑之秀也幸以經術遭逢聖明之
世既出矣而皆不及下壽少試其所蘊蓋士君子無不
悼惜之國家設科以來得士之盛江以西稱吾邑而甲
申至丙戌兩科蓋又盛焉甲申升者九人陳士啟湯流
獨孤樂善曾與賢余學夔蕭省身王直歐陽俊暨余姪

相丙戌升者五人曾春齡陳孟潔及其弟孟京羅仲深
胡雅雅既第而歸兩科十三人者皆為庶吉士在翰林
與纂脩之事吾邑斯文之盛蓋四方士之所慕艷而未
幾流卒與賢又卒丙戌之四人者又連卒雅家居則又
卒後丙戌而升者用常及王鉉梁輶陳賞王嗣先五人
未廷對用常又卒於是四方士為吾邑斯文悼歎不獨
三子者而已也闕人之先後卒者或余之親或久要而
仲深又與余同里巷至是其兄浦城典史仲固來京師

告余曰將歸葬吾弟必得子銘出示翰林脩撰王直所
為事狀余不能辭也羅故西昌望族祖某考尚文洪武
壬子鄉貢進士歷主臨臯仙遊兩縣簿二子仲固仲深
也仲深自幼為主簿公所愛嘗曰此兒必興吾宗未弱
冠喪父家貧出教里中童蒙取束脩以佐其兄養母而
益刻苦學問當其時鄉老碩師皆已歿無在者學者疑
不能通無所質問仲深獨守傳註古說熟讀深味日益
有得久而沛然而號仲深前輩者多自以為不如往往

即仲深求正是否永樂乙酉以邑學弟子員中江西鄉
試明年會試禮部中高等廷對賜進士出身授翰林庶
吉士脩永樂大典仲深沉潛朋敏寅出酉入不肯斯須
廢公同列者皆推讓之其卒以永樂某年某月某日某
年某月某日葬某原從先兆也子男某某銘曰

荆山之璞兮出孔多無幾屢毀兮嗟乎奈何嗚呼仲深
兮溫且良宜服用佩兮鏘珩璜亡者何遽兮存者徒傷

梁監丞墓誌銘

永樂十一年六月一日國子監丞梁里許以仁卒仲子澤將奉其柩歸葬欽州以國子博士鄒幼享所狀世次歷官行事介監察御史胡緊來乞銘以仁嘗典教吾郡又聞澤致孝於親惓惓也不忍固辭按梁欽著姓祖某考某以仁自幼聰穎好學稍長選為州學生洪武庚午舉鄉貢明年會試下第充太學生有詔選太學生教郡縣學以仁在選中授吉安府教授後丁外艱起服改國子學正秩滿陞監丞會祭酒被召在翰林司業闕以仁

受命署監事永樂十年也以仁自為校官旦暮出所蘊
為諸生講說暇即自學不懈在吉安訓導謝子方先生
以仁鄉試時座主也雖同官然執弟子禮甚恭私會必
侍坐請益必避席子夏曰仕而優則學後世學者不在
於為己沾一命志滿氣盈豈復有意自進而求能致禮
於所當下者加斲也於是以仁有不同於流俗者焉性
質直夷曠與物無競不察察為明然嗜酒坐是致疾卒
時年四十有五娶潘先卒繼段子男三津澤浩女一將

以某年某月某日葬州之某原銘曰

寧越之區合浦之濱孔雀明珠異產之殷嗚呼以仁和
厚秀文繇郡博士爰登成均亨衢翱翔榮澤津津如何
中道奄仆其輪氣升魄歸永安於此我銘昭之亦慰其
子

蕭處士墓誌銘

吉水蕭岐繇新化知縣陞寶慶知府迎致其父處士公
就祿養闕四年矣一日公坐庭中睹過鴈闕曰吾

將死乎疇昔之夜夢人緇衣而長身四

闕

指雲中

飛鴻而顧余言曰鴻乎鴻乎殆其俱旋歸乎今吾所睹
類是矣其將死乎明日得疾旬有六日卒永樂癸巳二
月乙亥也將以明年某月某日歸葬其鄉槎溪之原岐
求余為銘按蕭故永賜名族自文仲徙吉水四世至德
永德永生雲峯公考也公諱思柔字德剛別字槎菴自
幼魁偉秀明務學強識老長奇之既冠力進不懈屬元
季寇盜四起所在恣劫殺富家巨室各務出計捍蔽自

固所知有以是勉公者公曰彼其所加暴焉者或以利
或以憾吾世襲忠厚事文墨何憾且何所利不聽奉其
親率其妻孥往畊槎溪之濱十餘年寇禍卒不及天下
既定惟事教子弟子弟有力學博行者厚獎以勸處宗
戚有恩意嘗有夜偷入室家人覺將追之公止之曰彼
窮故至此奈何困人於窮也其人聞之愧悔卒改行焉
平居謹言行老益自重雖不試然岐於為邑為郡皆得
其民心要本於公之教矣享年七十有九娶毛氏子男

五崇岐昇武智崇昇武皆先卒女三適士族孫男九曾

孫男二銘曰

仁山崔崔文水瀾瀾代生丈人蔚乎有煒嗟惟槎菴括

囊韜光棲迹丘園逍遙相羊公才有為公

闕

俾民

宜之自公啟之既壽考終闕于斯原慶澤綿綿被其後
昆

郭彥思墓誌銘

彥思諱睿姓郭氏其家世見余所撰登州府學教授墓

誌登州與其弟湖州府經歷慶宜皆以經學治行知名
當世彥思登州之從子而湖州冢子也母車氏彥思居
家事親孝愛諸弟如愛己之身恒情所苦者惟恐一毫
及之如恒情所喜則惟恐不之及也維持羽翼靡或不
至然皆出乎其性非有所勉強矯拂至于今其諸弟相
愛及愛其兄弟之子皆如彥思之心彥思淳實坦夷與
人交表裏洞達治家不求有餘為文章取達意而止永
樂某年某月某日以疾卒享年若干娶賴氏繼歐陽氏

張氏子男一公獻女二張孟賢張樟其壻也士奇先祖考皆與登州湖州兩先生厚善士奇少壯時又交彥思及其弟彥鉉彥遷從弟彥常相距蒼南北有暇輒相就相講學未嘗倦也即倦稍縱為談謔或弈以嬉有一日累覲有終夕坐對氣合而情得也其後彥鉉彥遷及余皆出仕惟彥思彥常家食憮憮自足也無幾彥常卒又無幾彥思亦卒余皆哭之慟彥常之葬也余銘之彥思既歿時彥鉉彥遷皆守官在外故葬緩今彥遷自瓊州

府推官考績來京師與余言吾兄久未復土遷之不悌
言未既哽塞涕下不已余不忍聞踰月彥鉉典教在吳
興聞其弟來京師寓書首說緩葬罪在我辭益悲苦郭
氏之兄弟何其篤相愛如此哉世之人其孰無兄弟乎
於是彥遷得復職赴瓊將便道償所願也謂余曰卜以
某年某月某日葬吾兄某鄉某原子宜為銘余掇其一
端可為世勸者銘之他可類見也銘曰

嗚呼彥思孰不為兄子謂吾弟同氣之生嗚呼彥思孰

無弟者有惟愛兄歿不遺墮君子之行如穀異器舉一
以嘗百器一味鬱鬱新阡我作銘詞嗚呼彥思逝其遠
而

徐弘道墓誌銘

永樂甲申詔近臣舉士之能書者就翰林給廩祿職繕
寫且給楮筆俾暇益自進其能時永嘉徐弘道以舉徵
至弘道工隸楷其為人恂恂溫慎寡言未嘗揚己抑人
亦不肯苟且徇物與人交澹然而久益見親可謂端厚

君子者矣弘道自幼力學明書經洪武庚午以太學生
中應天府鄉試遂擢親王府紀善未幾改廣西道監察
御史歲餘罷罷今二十餘年縉紳間猶稱其清慎云永
樂甲午河南布政司聘考鄉試以疾不赴明年八月九
日卒於京師享年五十有九弘道諱定其世家永嘉曾
祖源晉陵縣丞祖益惠安縣典史考士良妣陳氏娶金
氏子男一人叅女一人歸金寧於是叅寧將歸其喪葬
某鄉某原介黃卓陳闕茂來請銘余與弘道處久矣為

之銘曰

資慙兮行脩泊而安兮不競與綵嗟乎已矣兮閔斯丘

故桂東縣儒學訓導廖潛仲墓誌銘

永樂十六年七月二十四日桂東縣儒學訓導泰和廖
潛仲卒廖出周文王子伯廖之後五季之際繇金陵徙
泰和世襲儒業洪武初為泰和縣學教諭曰子謙稱愚
寄先生者潛仲祖也父叔章母王氏生二子龍鸞龍潛
仲也潛仲幼喪父教育於其祖祖卒潛仲未弱冠也卓

然有立志出就學縣博士日自策勵讀書為文不襲成
說躡故跡著四書經義論策多至千篇同輩莫及也儀
觀偉然面白皙如玉疏髯秀眉雍容凝重人不得窺其
際善談論閒暇於鄉人朋友飲酒縱弈嬉間出片語相
調謔輒傾一座以是無少長賤貴皆樂親之然其中素
所操執者未嘗假借也永樂元年充貢為太學生召試
文淵閣除鳳陽蒙城縣教諭後丁內艱服闋改雷州海
康縣學教諭兩縣學教皆久弛潛仲力作新之初至蒙

城五年來海康四年則通三考滿矣雖其學者多有成
中科選者皆選於潛仲去職之日例不得書績遂降郴
州桂東縣學訓導在桂東期年盡力職務雖疾不廢易
簣之旦猶闕升堂見諸生蓋年五十而卒潛仲不以

利廢義繼祖母袁一女鍾愛祖有遺貲產袁率簡畀其
女然後斥其餘畀潛仲族姻不能平潛仲獨無一言孝
事袁終其身袁卒或教質於官以復其產者終不聽而
敬其姑如袁之存也終身不衰潛仲自少壯負理才使

受一郡一邑而為之可以得民惜乎其未見試也娶譚氏有婦道子男二丌謨謨永樂癸未進士翰林庶吉士女二長嫁鄧時亮次嫁鄉貢進士劉組孫男三丌謨將卜卒之歲某月某日葬于某山某原以余其父友也奉事狀請為銘銘曰

士重者義而世以利才庶有濟而蓄未試命之不猶行則無愧

前浙江布政司左叅政林公墓誌銘

前浙江布政使司左叅政林公諱瑜字子潤漳之龍嵩人其先出晉拒遠將軍晉安郡王祿之後而居泉之龍得世業儒宋慶元中有諱起東者始徙龍嵩再世至鳳公之高祖也曾祖詔承直郎龍嵩縣丞祖宜慶元以明經為南靖縣學教諭自出貲作先聖廟不以勤衆考得元季寇亂有保禦功分省承制授長泰縣簿復授百夫長皆以母老辭娶黃氏生五子其五公也自少有志於學洪武中為太學生居太學五年擢五軍斷事中司稽

禮又六年陞右斷事公居官以忠愛為本於議獄多所
平反數月陞江西按察司僉事授奉議大夫陞奉政大
夫行部過贛有姪殺其伯母者獄已具公聽其辭而加
察焉實豪民索逋不得擊殺之而以賄移於其姪竟坐
豪民而釋其姪安福有強盜數十人郡縣連歲捕不獲
給事中及三司奉詔發兵捕之而不急捕盜更聽姦民
悉取民之富者誣以匿盜非法考掠備極楚毒富民不
能勝傾重賂乃得釋既又及平民盜以是遂逸去而平

民不間貧富悉困矣奉詔者既以罪去而公代盜悉得而民若不知者公和厚樂易待物以誠用法持平恕臨政務寬簡所至禮賢下士考閱諸生而獎勸之歷三考以最陞本司副使授中順大夫流民聚長沙為寇與袁接境朝廷命豐城侯總湖廣江西兵擊捕之總兵檄公招撫脅從者多歸焉渠魁既得餘黨復叛公復往撫之遂以無事嘗督造戰衣一百萬期三月完如期而集又從工部尚書宋公採宮殿材于蜀而公分往馬湖極險

遠之地事集而民不病蓋公於使人必酌其力體其勞而善撫之初自蜀歸有重獄二十餘人疑未決公立直之又三考當去於是居江西二十餘年矣前所未有民者耄三百餘人遮馬首羅拜曰公厚德被我民久矣民何以能忘公今決去不留其何以慰民之思也相挽公足出一履競取之公乃得闕馬馳去以最陞浙江布政使司左參政浙江素繁劇時布政使以下員皆闕公至獨任早夜躬勤不少懈踰年吏舍夜火延毀公署及丈

書事聞并逮公詣秋官公輒引服不自辨未奏以疾卒
永樂二十一年正月朔也公在官三十年祿入益厚而
自處泊然不加布素時平居教子嘗舉汪信民菜根之
言曰此立身之要也諸子日務於學則訓之曰學以明
善誠身而達於用文辭非所急也公間為詩文未嘗存
藁喜書法晚亦斥去家居有後山之勝而仕於外未嘗
忘也輒以自號云娶曾氏有懿行子男五人嵩高嵩暘
森高京陽華高嵩暘先公卒女一人適蘇實孫男八人

冠冕弁旒纓圭璧組孫女六人於是嵩高京賜治殮畢
將奉柩歸葬以進士王源所述世出事行請銘將以納
諸窆嗚呼明辯之才機巧之智剛厲之氣非不適於世
用而平實之行寬簡之度安靜之政使人稱為忠厚長
者如林公其可多得哉士奇江西之人也知公之所施
間嘗與公往還又知其所存故不辭而為之銘曰

漳有後山孕靈毓清是生林公溫裕靜貞躋華朝著職
時讞議允直且平靡或愆謫大江之西肅肅風紀表其

儀威亦篤愷悌奕奕浙藩祿位益崇丕贊承宣夙夜惟
恭居無幾何鬱攸為咎公曰予責敢疵司寇其德孔厚
其隱誰白逝者不復知者徒惻故丘有藏既堅且深載
行勒銘式視來今

故中順大夫詹事府少詹事鄒公墓誌銘

永樂二十二年三月初六日詹事府少詹事鄒公卒於
官公之先自攜李徙錢塘世畜德不仕考壽之博學有
志遭元季亦晦迹不出公諱濟字汝舟蚤喪父事母以

孝稱天資穎敏好學強記稍長游縣庠材識為同輩所服先生君子多重之餘杭令聘佐教縣學遂奉母徙家焉而毅然師道自任振起諸生皆趨於學一新學舍自令丞以下皆嚴敬之秩滿陞中都國子學錄又陞國子助教一時國學之為師者皆樂與交為弟子者多樂就其講下無幾坐事自陳左遷西安府學教授未赴改河間府學用薦者陞平度知州階奉訓大夫廉簡寬厚吏民安之丁母憂服闋用翰林脩譔李貫舉脩實錄官事

撫要井井有章書成賜紗衣一襲幣表裏各四白金五十兩陞禮部儀制郎中階奉議大夫進奉政大夫時朝廷祭祀冊拜慶賚及儀物制度徵舊章叅古典蓋部一資於公詔脩永樂大典以五人總裁而公預焉安南拒命詔大將軍帥師征之擇朝臣有文學者徃司奏記公承命以行軍事多所助益安南平踰年餘黨復貳王師再出公亦繼往還陞廣東布政司右叅政務持大體而簡重寬平以率郡邑嶺海之區政化行焉坐累左遷吏

部郎中數月擢左春坊左庶子在輔導之職言無不從
寵遇特厚奉令旨授皇孫經明於啟迪滿秩陞詹事府
少詹事階中順大夫公為人和易坦夷不見崖岸於物
無所迁自公卿下至武人庸隸皆樂親之其學長於春
秋為文章不煩思索舉筆率就所居號頤菴客至必具
酒相與傾洽遇朋徒之會山水之游輒欣然從之不以
事廢兼嗜老釋之學旁通深造雖其徒尊宿者鮮或過
之蓋春秋六十有八而卒娶袁氏繼薛氏子男二本幹

二女長適大理寺丞永嘉湯宗次未行孫男一炳公雖
歷事三十餘年數更顯任而沒之日家無餘貲惟藏書
數千卷而已余與公同為史官時往還後春坊同寮又
十餘年相與益厚於是本幹將奉公之喪歸葬餘杭以
左司直郎金寔所為事狀請銘義不可辭為叙而銘之
銘曰

繫公之興自儒師詵詵執業趨臯比表植模範懸著龜
陟于上庠閱厥施紬書石室登金閨討論五禮宗伯資

叅贊戎幕文翰馳旬宣出佐南海涯官坊入恃騰寵輝
猗公歷試罔不宜剴觚削畦和以夷有不為公矩入規
盍視公履誰疾疵天目之趾公全歸後欲考德徵銘詩

葉處士墓誌銘

仁和葉處士卒其子中書舍人綦將奔訃歸纁經奉兵
部郎中柴車所狀處士之行泣拜請銘其葬按狀葉故
汴人從宋高宗南渡家杭之仁和遂世為仁和人處士
諱茂字茂實三歲喪其父某七歲喪母而鞠於叔母九

歲遭元季之亂寇陷杭州家人皆散失處士被俘即脫其耳金環畀寇寇舍之去既歸而孤惇孑然日夜悲摧感憤能奮弱為壯圖所以自立十四治生事日益見端緒既冠遂殖其家國家平定四方挾其賞遊中原走關中轉歷山東西又南泝大江浮彭蠡踰五嶺縱觀乎南海而循八閩以歸遂裏足不出日親其鄉之君子以適於恬憺幽閒之濱而志於義施常推所有以振窮恤匱假貸不能償者還其券教其子力學而勉之曰吾適生

非時而不違於此也汝必成吾志長子擢官近侍喜動
顏色諭之曰吾及見汝榮達幸矣然必無辱君父乃汝
之賢年八十而卒其卒以永樂癸卯十月九日而葬以
卒之明年某月某日墓在錢塘西山之趾其配岳氏其
子男二長即秦次蕙女一歸周某孫男三魯壽祖某銘
曰
弱之艱奮而克彊壯之通歛而弗揚其行之臧而壽與
康而俾來也昌

王處士墓誌銘

龍溪王處士卒將葬其子大理評事昇奉韓府長史楊
曜宗所述世出事行介翰林侍讀李時勉以求余銘余
識昇於南京素已重之不忍以辭按王氏之先居光州
固始自唐徙閩而家漳之龍溪世遠族盛至義甫娶李
氏生四男子其三處士也諱舉逸字宗禮少甫知學而
父兄相繼沒即奮自立躬畊以奉母事母生養死葬克
致其誠歲時祠祀祖考遵用儒者禮不惑於流俗冠禮

廢於鄉久矣酌古今而行之於家洪武中郡嘗推舉孝廉輒自忖念國家所為表德勵俗甚盛舉也顧余之鄙陋敢忝竊哉卒辭而勉其子於學曰吾蚤孤多艱而不遑於此也若等必務焉又曰學必審夫義利之幾庶幾切己用也廣購書籍禮致明師以資之昆弟族姻之子亦必勵以學雖有畎畝之務旦暮躬率不廢而名其宴處之居曰息耕為人溫厚端謹而樂施濟親戚鄉鄰急難者恤之貧乏者賙之歲歉穀貴倒廩以貸其償與否

不計也里津渡舟梁壞輒治之嘗颶風望一舟漂里大
溪中失楫幾覆遽命家人健勇數輩以舟往援之一舟
之人免於覆溺所及人槩類此其卒以永樂癸卯十二
月二十日距所生至正甲申歷歲八十初娶林氏有婦
德躬儉勤相夫以殖家先若干年卒葬其鄉之某原繼
郭氏子男二長即昇次寓女二長嫁胡永誠次嫁林昱
孫男一彛女八卜以卒之明年某月日合葬

闕

人

之寯之左昇永樂二年進士歷安福羅田知縣平涼府

推官大理寺左評事能敬慎自持其初為安福於吾同
郡在官數月召還民攀轅送之有至於流涕者今殆二
十年民猶思慕之不忘非誠心愛人何以致此此吾所
為不忍辭銘者也銘曰

民之類四士農其先農以本重士以道賢越古有士匪
力弗食凡古之農孰匪士德允篤宗禮殆古之民悅義
與仁勤穡以身亦既壽考而全其歸垂祉續聞嗣世有
煇

故翰林庶吉士宋子魁墓誌銘


永樂十九年四月二十八日翰林庶吉士宋子魁卒於
北京年三十有六其素所交游皆嗟傷悼惜之不已其
始病也余與錢檢討習禮往問之醫者從傍製藥語余
曰即三日或五日瘥矣豈謂更數日竟以不起子魁為
人溫然與人交能輔之善猝有緩急可望而所為悼惜
之者明於世務達於理道有慈厚愛物之意蓋可用而
未用而今已矣於是其從兄吏部主事子環既殯之丈

明門之外遂出翰林編脩尹鳳岐所狀事行泣謂余曰
吾弟不幸不得少見於時其可使無聞於後乎願得一
言他日歸葬于鄉也刻之墓中按狀宋之先自廣平徙
新淦後徙吉水至榮甫又徙廬陵榮甫生長卿長卿生
彬之其曾祖也祖成章復居吉水父若宗母張氏子魁
諱魁生而秀稟異常兒稍長穎敏好學讀書或忘寢食
日益有造詣選補縣學生下筆為經義論策群輩多讓
之永樂九年中江西鄉試十三年陳循榜登第為行在

翰林庶吉士文學益進預脩性理大全等書書成受賜
賚明年扈從還南京十九年春奉詔送祕閣書籍至北
京無幾得病未病往謁祭酒胡公座中有察人氣色以
決休咎者特戚焉於子魁蓋旬浹而卒卒數日凡為庶
吉士者悉送吏部將授官而子魁不及見矣子魁娶鄧
氏子男二忬恪女一卒時父母皆老子幼暨其妻皆不
在側病而扶持之歛而殯葬之皆子環也銘曰

材也必度諸匠石駿也遽仆于皂櫪存豈不厚胡薄其

壽皤皤父母娶負其幼曷其歸依曷所歸咎



東里續集卷三十八



欽定四庫全書

集部

東里續集

三十九
四十

詳校官檢討

臣羅國俊

中書

臣

劉源溥覆勘

總校官進士

臣楊懋珩

校對官中書

臣楊世綸

謄錄監生

臣王增聞

欽定四庫全書

東里續集卷三十九

關四十一行

明

楊士奇撰

欽定四庫全書

關

東里續集



急能

赴之於人一言不合輒去然無宿怒意休休園林泉石
之間不以外物累其心可為善人也矣宣德十年六月
十九日以疾卒春秋六十有四娶羅氏余同母妹先八
年卒繼鄭氏子男三長榮廣西按察司知事能不改其
質次渠次榦女二陳珪蕭岸其婿也余官翰林十數年

遣子稷歸守家尚髫髻賴康氏妹維持教誨而彥英顧
盼助恤良厚彥英嘗一至南京視余夜共飲酒余片語
過直不憚鷄鳴告辭去予起謝之彊留數日竟去然所
以顧恤稷者不替昔也吾妹沒吾哭之哀數附書稷令
所以事康姑夫禮加厚豈意彥英又沒哉故為志其塋
而因以及予情云銘曰
璞兮不鏤而坦於幽歸全斯邱

止齋陳先生墓誌銘

余仕兩京三十有八年鄉閭故舊淪謝殆盡五七年來
親戚交游老成輩行中有書畀往還相問者惟止齋陳
先生一人今年其子餘書來求墓銘則知先生又謝世
矣為之悲悼久不已乃叙而銘之先生諱泰先字仲亨
止齋者其講授之居所名也陳自五季繇金陵徙泰和
歷宋元至今貴顯相望而以科第進者不可勝數元贈
萬安縣尹吳文正公為銘其墓號菊存者先生高祖也
瑞金縣尹以贛州路推官致仕號梅村者其曾祖也祖

以道潮州教授父有慶博學擅文章母蕭氏先生幼孤
遭兵亂貧窶與兄仲述盡力養母而勤於學兄弟治家
少間輒挾冊往從鄉先生劉尚書崧歸則兄弟自相講
論會有詔興學校縣大夫舉仲述充博士弟子先生獨
留供養綜理其家凡家之内外長幼寒暑旦暮之需未
嘗乏也仲述舉進士為御史先生居鄉恂恂謙恭足跡
未嘗及縣門縣令丞如不知有陳御史家劉尚書卒獨
有遺腹孫先生曰吾可以忘劉先生乎以子妻之先生

雖老猶朝夕坐函丈授徒不倦或以為言者則應之曰
吾豈為利哉顧先人之所業且吾少壯時所資柰何老
而遂棄之也平居事母孝母沒卜日將葬霖雨旬浹弗
止葬之日遽霽既葬雨如故人以為誠孝之應嘗省仲
述京師適仲述坐累下獄先生上疏白仲述寃竟得釋
仲述卒於官撫育其子先生以德望重鄉里里有競爭
必趨先生求直故家大族凡宴會必得先生正尊席為
榮縣舉鄉飲禮賓及有所咨政必於先生先生貌古而

氣清色溫而詞正儀度雍容恒俯接下無間貴賤老穉
皆喜親之嘗有甘露降其庭竹上識者以為養老之祥
凡受朝廷賜帛牛酒者再年八十餘康健不衰飲食步
履如常一日得末疾遂不起正統戊午八月二十九日
也春秋八十有五元配王氏繼胡氏子男四皆王出餘
台州府學教授直福建按察司照磨復邵女三人劉仲
兼曾敏仲蕭仰初其婿也孫男十弁弁真獎龔葵卅祿
岳章女九曾孫男十先生之葬以某年月日葬在某原

惟陳楊二氏嫻好累世如朱陳先生與余又皆少孤貧
賤故契誼特厚余嘗念得謝事歸旦夕相過尊俎談笑
以終餘年者惟先生一人而先生不待矣余能不悲乎
能不悲乎銘曰

陳來西昌越四百禩崇科清秩累累聞世猗歟止齋隱
居求志道行鄉邦奚必有位猗歟止齋文範是似我銘
其藏有道不愧

梁先生墓誌銘

永樂八年七月二十又六日西昌梁先生卒邑之賢士
君子皆走哭弔市廛郊野之氓多咨嗟傷悼亦有趨赴
哭慟者中外縉紳大夫知先生者聞赴亦多嘆息有作
為詩文以悼之者先生諱蘭字庭秀別字不移梁之先
唐長壽中由長沙徙西昌八世祖蕃字均崇仕宋為權
知鳳翔府與其弟同知黃州充史館編脩官均傑皆有
名於時曾祖昭伯祖才可父彥卿號心易母楊氏元新
喻州判升雲之子生三子先生其仲也自幼警敏未七

歲入小學讀書究文義心易公竒之稍授之經自勵不懈未幾元季兵亂父兄相繼沒世獨與弱弟奉老母處貧困然能適其母之意如未嘗困也而奮力於學不廢皇明混一天下授徒里中以資奉養教其子明經飭行恒語之曰今幸遭明時沐浴平之澤不可苟焉自逸忘所施報長皆命之仕戒之曰士貴有益世用非徒資祿利苟榮其身而已長子潛歷宰四會陽江陽春三邑入為翰林脩撰兼右春坊右贊善次子混歷訓導瑞州府

學教諭漂陽縣學先生東西往還就養日有輕煖甘脆
之奉賓客之娛可以自樂二子亦異以此樂其親先生
歎曰盍求樂吾志可也顧謂之曰惟克有終以不辱國
命貽我羞吾獲歸守先人邱墓以詠歌太平盡吾之天
年為樂不既多乎其子強留之不可既歸日與故人朋
友尋山水之樂命酒賦詩任意所適於邑西柳溪之上
闢畦蒔蔬雜植花竹引泉灌注而築室其中游焉息焉
觀道玩微逍遙自得作畦樂詩數篇時歌以自適然猶

數賦詩寄其子勉以盡忠不置也既得疾即謝醫藥曰
至此命矣疾革命侍使具盥盤起沐浴又命取深衣幅
巾家人請所欲言曰葬祭以禮不一語及他事卒年六
十有八性儉素博學明識教人以五經四書為本若左
氏以下暨荀揚劉向之徒所著書必為辨析是非孰之
當取孰之當去諸生聽先生講說旨義條達精到皆忻
忻如得甘食為文簡而婉詩馳騁魏晉而冲澹自然有
陶靖節之趣嘗曰士當立心高明尚友千載庶幾不墮

庫陋居家未嘗疾言遽色而家政肅然與鄉人處得其敬愛有窮乏者亟振之或貸不能酬折其券為人解紛排難未嘗求知有知而謝之輒辭初心易公出後鍾氏故先生嘗從鍾姓既而梁氏之後絕潛始以先生命請於朝復梁姓云娶陳氏有令德二子即潛混孫男五女六曾孫男二先生沒時潛以扈從北京混官漂陽皆不在側是年冬始克奔喪歸將卜明年某月某日葬於邑南某鄉某原先事以狀屬士奇為銘士奇於先生有世

好且少嘗從受詩法義不敢辭不銘銘曰

五色鮮好被厥躬緼仁持義履適中力探姬孔辨況雄
指示當路開瞽矇金舂石應歌時雍有嗣樂志諧奮庸
蕭搖相羊臻考終澄江之南馬鬣封塚詞幽堂永弗罄

顧仲華墓誌銘

正統二年九月十有二日太醫院士顧仲華卒於北京
子賜以翰林編脩楊仲舉所述事狀求予著葬銘按顧
氏世居蘇之崑山太父諱福元平江路團場提領父諱

明母陸氏仲華諱文榮有孝德洪武中以閭右徙實京
師父已早卒奉母就養愛敬兼至母患痠疾徧叩醫弗
效竟卒仲華慟弗勝且自憾不習醫不能起母疾也終
喪即從良醫師學日益有造詣久而治疾多愈太醫院
奏舉醫士家貯善藥務施濟蓋窮乏者得之加衆尤能
捐利以濟急鄉人傳巾逋公租八十石將驚其子於市
以償邂逅仲華訴焉且訴即鬻子不足盡償也仲華惻
然動心語之曰母患苦吾為若盡償也邀至家予白金

六十兩遂盡償租又周乙者將往戍廣西而行囊無一錢走乞於仲華出白金三十兩贐之又周丙者負官鈔九千錠自計鬻家產僅償五之一欲自經仲華聞之予鈔三千錠教為市取息以益不踰年悉償官番陽潘晦初客京師邁疾仲華延於家躬視藥食潘革泣謂仲華曰以死累君柰何且骨將安歸仲華曰論交豈以存沒為盛衰哉棺斂有一毫不周備者文榮不名為人然必寓書君之子歸葬卒踐其言凡遇老疾無依死無飲葬

者皆振恤之襟宇和坦喜與賢士君子言論未嘗役志
生計通邵子數學推將來事多有徵驗國子祭酒胡若
思翰林檢討陳嗣初皆為著傳一日豫戒家人治歛具
既而疾作即却醫藥進其子若孫諭之曰吾家素尚儉
有羸必推以濟人若等惟忠孝寬厚相承即吾瞑目無
憾矣語訖而卒享年七十有四元配張先二十六年卒
繼范氏子男一即暘溫粹孝友明於醫今嗣為太醫士
女二長歸朱讓次歸吏部考功郎中夏衡孫男一瓊女

二仲華之葬以卒之明年二月十七日葬在江寧縣安德鄉石湖村長山之原銘曰

其存之仁其施之厚其報之隆有在厥後

封承事郎監察御史嚴君墓誌銘

監察御史嚴恭之巡按廣東江西也姦豪懾其清彫瘁樂其仁蓋風采不嚴而肅聲譽勃起予初未識也而耳熟之一日求之稠人中得焉雖心重之然不得數相即蓋其屢以使命出也比還纒紆一再過余求銘其父之

葬子素重恭故不復辭按狀其父諱玘字子成家錢塘之平安里子成之曾祖諱德興祖諱世安父諱斌皆不仕母某氏子成自少能頌頌卓立辛勤治居室蕃種植孝養父母而愛其弟某甚厚洪武中朝廷封建親藩簡民秀壯充侍衛子成與焉其弟曰父母老非兄孰任共養力請代行父母不能止然不忍少子之獨往也命子成送之中都子成且行顧其妻曰汝必盡力奉養吾親毋分毫怠忽既至中都扶持其弟數年乃歸弟後侍衛

赴成都子成心恒耿耿不忍西望寓金帛衣服遺之者
無虛歲每自念少窶幹蠱立家不及學遂以教子為要
務極力禮賢師購書籍以資之於子孫善訓誘待人以
誠長里中徭賦恒捐已以益匱乏者性不飲酒尚樸素
衣止布帛未嘗一服羅綺年四十妻喪不復娶雖老不
近侍婢喜究釋典意澹如也宣德中以恭貴封承事郎
陝西道監察御史贈其故妻陸氏孺人子成正統二年
六月十四日卒享年七十有四陸孺人家同里甫筭來

歸孝事舅姑得其懽心舅姑卒相夫治葬事極周脩尤
篤教子晝夜訓勵其學委曲切至逮屬續猶懇懇為言
不及他事永樂壬辰正月十七日卒享年四十有六子
男二長毅次即恭舉進士擢行在陝西道監察御史克
承父母之訓者也女三長適孫勝宗先卒次適王昌其
季未行孫男五祀裡社祚裕女一初陸孺人葬邑之佛
樂塢至是毅恭奉御史君葬其右地道所尚也銘曰
行在諸已奚其仕嗣興有煒沒且貴屬銘于史庶不死

贈刑部右侍郎吳公墓誌銘

正統元年十一月二十六日刑部右侍郎吳公某卒訃
聞上遣進士張瑾賜祭且命有司治葬其子禮部左侍
郎廷用詣闕謝既退過余請余著葬銘按國子祭酒陳
君元世所具事狀吳氏世為建寧政和之豈弟坊人公
諱某字某晚號菊莊曾祖諱越祖諱義考諱某贈刑部
右侍郎元季兵亂能保障其鄉邑邑人德之母魏氏贈
淑人公天資淳質而端謹忠厚讀書明理言行必主於

善事親孝與兄弟同居相友愛每旦一堂相聚言論怡
怡然諸子姪或不率未嘗作辭色但善諭使改諸弟沒
弟之子固求分異不能止資產悉聽擇便利恣其所欲
而已取餘焉處鄉鄰敬長慈幼一盡其誠周急卹患弔
慰贈賻加厚死不能葬者與之地有貸公金過期不能
償將鬻子以償者公聞而召至毀其券不復責償既老
建南莊別業日有琴書花竹之娛超然物表也公年既
高廷用奏歸省時公年九十有三康寧和豫廷用亦六

十有七父子並貴朱衣象笏斑白映照於一堂之中鄉人榮之公竟以是歲捐館子男一即廷用元配張贈淑人繼邵封淑人男張出也永樂甲申進士戶科給事中陞行在刑部右侍郎轉禮部左侍郎淳厚敬慎有父風歷官四十餘年仁廟嘗稱為君子尤所簡知有以見公之教成於家女一歸李景程孫男三人煥旒通廷用將葬公於邑東瞿里其地宜石槨徧索不獲將代以木啓土得石槨於傍近甚堅厚脩廣咸稱殆若有神相者人

謂公積善之應嗚呼踰九望百之年上壽也世或萬一
見之如又生被褒封享祿養光榮令終加鮮矣吾仕於
朝垂四十年所知者兩人永嘉黃少保思恭及公皆九
十有三雖品秩不齊然其所膺褒封祿養榮終等也又
皆於吾銘葬而公所得石槨事之異豈非積善有誠之
所致歟銘曰

壽為福首上者歲百維皇建極維已殖德噫嘻吳公厥
德孔殖允孝允悌以恭以飭惟善之循惟仁之迪際時

泰和淳化園園如春被物充悅潤澤栖遲丘園蕭散澹
適有嗣在廷光奮乃績帝庸嘉褒寵秩有赫壽祺奕奕
人倫天錫肆用表之刻茲貞石

封工部營繕主事任君墓誌銘

工部郎中豐城任禮縵經奉翰林侍講孫曰恭所狀乃
父主事君家世事行泣拜請葬銘禮永樂十九年舉進
士余考禮部會試時所選奏者且以鄉邦故數往還不
得辭按狀任豐城故家宋景定三年登方山京榜進士

曰陸呂者主事君六世伯祖也曾祖雲卿祖觀德考原
傑皆隱居不仕主事君諱能字載遠為人質實明道理
雖處廛市所務園田外不別治生業蚤喪父母與兄丈
遠居友恭相篤治其家肅然念其先科第久未有續旦
暮以勵其子禮登第授官又勵其庶慎之節歷舉邑之
人語之曰某也以庶慎致遠大某也以不庶慎至覆敗
其可不勉又曰必勉之庶幾可不忝朝命不辱所生禮
亦克奉教卓立不滓於羣污中天官考禮績最奏推恩

封父承德郎工部營繕清吏司主事主事君既拜受命
顧禮曰誠由汝克立致茲榮命然當勉圖為老人保終
此榮庶幾孝子禮拜稽首曰不敢違教人皆為主事君
賀主事君於敬德持謙和益加於昔素急人之急所居
瀕江江漲有清江人乘舟及門而溺已失舟主事君適
見之倉卒投一板援之獲濟樂安民五人遠役還病且
憊暮及門外岸隄下止焉是夜風雨大作聞啼號聲主
事君駭曰是必失所之人遽起眎之取苫席蓋覆且戒

家人煮鬻食之既而兩人死為藁葬岸側而旦暮飲食
其三人後五日五人者之家聞其道病皆走人迎候至
則具禮以謝主事一無所受其他如饑歲分廩以振匱
乏不畜私量以苟利厚德非一歲邑令舉鄉飲必賓致
焉卒於正統三年二月一日享年七十有三配鄭氏封
安人子男三長即禮曾鶴齡榜進士擢工部營繕主事
今陞郎中次立次吉孫男六長善宣德乙卯中順天府
鄉試次士淵士沾乞真同壽元保曾孫男一主事君之

葬以某年月日墓在某原銘曰

有耀于前克念嗣之有嗣于後克勤勵之命服在躬厥德之應子孫繩繩尚鴻厥慶

外祖靜得陳先生合葬墓誌銘

嗚呼我先考少傅公先妣陳夫人當元至正甲辰鄉邦寇亂舉家徙避於袁又三年先公棄代不肖孤時甫晬先夫人抱孤孩留袁幾一歲時外祖靜得先生外祖母曾孺人皆避亂平川初陳氏三壻獨先公清德最為外

家老長所禮重至是咸傷先公之喪也曾孺人尤悲念寡孤在遠方不能歸也旦暮號泣不已於是靜得先生躬履榛棘涉艱險來歸先公之喪與先夫人及其孤孩幸抵西昌時洪武元年也外家既留於平川曾孺人歲時數數遣人撫存寡孤惟恐其失所也不肖孤生十年曾孺人沒於平川先夫人晝夜哭以不肖孤之始有知也間暇輒舉外家事喻之且數告之來歸之故曰小子其永勿忘靜得先生後歸沒於西昌先夫人亦繼謝世

惟曾孺人尚旅殯平川不肖未嘗一日忘也屬縻祿近
侍不遑遂私宣德八年始克經營啓殯歸西昌其孫孟
高曾孫忠憲得吉卜於千秋鄉龍門之原且將啓靜得
先生殯而合葬焉於是憲走北京屬誌銘嗚呼不肖躬
受外家罔極之恩生七十有四年矣矧今熟外家世德
莫或深於不肖者尚敢稽乎陳故西昌儒官家由宋以
來科第甲一邑舉嘉定丙子貢士曰師皋生淳祐丙午
貢士子安安生書友書友生主一皆以經學教授邑

中主一之配倪孺人二子伯諱謨字以德學者稱心吾
先生仲諱庸字以靜稱靜得先生靜得先生器宇闊達
趣韻蕭散不屑意生產事少承父兄之教博學工文辭
而論議明正心吾先生每服之孝弟睦婣之行本於天
性愛兄子如子子婦之兄患難狼狽走平川依之舍之
館下衣食之旦暮親授之書教之為詩三年而後去後
竟倍不校僑平川二十餘年從學者甚衆先生善講說
條毫明潔聽者言下領悟於教小學尤有法贛郡學平

川邑學皆聘訓導不就嘗被徵詣京師力引疾辭既老
始挈家歸西昌時革運已久鄉變更一新先廬僅餘瓦
礫田園悉墮巧效則僦數椽以蔽風雨教里塾以資寒
暑朝夕澹泊蕭然而正固自守是時儕輩已盡里巷後
生流俗莫或知之其意未嘗不自遣也雖老不厭學遇
異書奇文皆手錄之工篆籀於醫藥卜筮皆有造詣有
詩文數帙藏於家洪武丁丑二月一十四日沒享年七
十有八曾孺人諱福曾同里世科家曾祖梅伯宋進士

累官紹興府同知祖懷可元袁州路儒學教授學者稱
鷗江先生父思立嘗舉鄉貢已而退伏不出母李氏曾
孺人天資端重慈惠明肅既歸陳氏孝敬雍睦倪孺人
悉付之家事雖躬任勞而每事必謀諸其妣羅孺人乃
行未嘗或專凡所為必當大義主一先生嘗病靜得先
生出治藥時倪孺人及心吾先生在側主一先生言人
恒情老念少子吾即不起負郭田其子庸三之二心吾
先生跽曰負郭田不及百畝即大人不言謨將悉予弟

奚啻於二主一先生不懌而默已而靜得先生還曾孺人語之故且曰獨不知事兄之義乎靜得先生趨入跽曰父母而次兄實長若之何我多得負郭田應多授兄主一先生顧倪孺人曰渠曷遽知之曰曾新婦所導也主一先生拊席喜曰佳兒佳婦佳兒佳婦數日病瘳後舅姑皆沒羅孺人又悉付之家事雖細事不自專必白而行而羅孺人一惟其言之從也蓋終身與羅孺人相親愛如同產兄弟有疾更相扶持皆如痛之切已身也

一日羅孺人因宴會止宿子婦家中夜譴驚傳安成寇
至州人倉卒扶老挈幼出走渡江婦家扶羅孺人俱渡
時兩家各東西散不知所向兩孺人皆以相失悲傷不
食飲後遣人求得之羅孺人竟違其子若婦獨與曾孺
人偕避寇入南山中邈迤趨平川心吾先生時客韶陽
曾孺人率子婦事羅孺人盡愛敬羅孺人甚安之蓋忘
其在旅寓也居數年羅孺人沒曾孺人哭之慟累月不
已葬祭一如禮曾孺人於治家秩然子姪及婦皆祗肅

聽訓教無敢踰越食飲衣服之給必均一自婦以下至女奴有疾悉親視其藥食故不間貴賤上下雖嚴憚之而心歸之以洪武乙卯三月十二日沒享年五十有八子男二長能字孔武後數年卒於贛次興字孔載幼為族人仲斌後兵亂遭俘女一即先妣累贈夫人孫男二皆孔武子長孟京永樂丙戌進士翰林庶吉士次孟高曾孫男三忠憲懋銘曰

猗歟先生德醇行莊于守有常于教有方猗歟孺人允

貞允肅維仁之存維義之篤嗟古賢哲恒難其配懿此
令人合璧駢瑞龍門之原歸焉有墳春秋霜露來拜如
雲

姪孫敏達墓誌銘

嗚呼吾宗之居西昌者其先雖出處不齊豐薄不一然
皆服詩書修仁善文學有聞行義有稱雖厯世變處憂
患而執守不移故世為邑之望然先澤既遠三四十
年來老成凋落且盡後生晚出不能究知上世其漸習益

下蓋余出仕四十年徃徃聞其所行有可為太息可為
流涕者矣嗚呼是豈祖宗所願於後之人哉吾蓋慄乎
懼吾宗之衰也比二三年有如吾志者得兩人皆仕於
南京從子太學錄弼族孫都察院檢校挺皆克明於義
利之辨而謹諸躬然為挺尤難挺早孤而艱有立志孝
其母敬事二伯及愛二弟無失自少勤學恒裹糧從師
治詩經夙夜淬礪持行端恪宣城令以賢良方正舉於
朝召至試文章遂授檢校挺事上官如父待寮之長如

兄一盡誠意與人交謙和惻款而治其職務縝密謹慎
不以風雨寒暑稍怠取予以義不一毫苟且而能急人
之急合院崇卑皆賢之無間言右副都御史五雲朱公
遣子從之學而賓師禮之聲譽日起衆咸謂吾楊氏有
人亦謂其祿位必且遠至矣一日得疾左副都御史海
虞吳公偕朱公往視之二公皆有憂色吳公為致數醫
醫皆曰此於法不治二公曰雖然無不用藥之理挺時
甚貧凡百藥物之資皆出二公藥之數日竟卒二公及

其屬弔臨皆慟二公又共為具棺斂吳公歎曰何天道
之不永善人也其屬相率出資歸其櫬及其妻孥諸司
亦多有悲挺而賻之者余時在北京聞挺死甚戚蓋不
徒戚挺戚吾宗之若挺者鮮也嗚呼惜哉挺字敏達其
曾祖師魯祖子尚考彥威母郭氏其娶尹氏子男二儉
倜女一皆幼挺卒於正統三年某月日享年若干葬以
卒之明年某月日銘曰

夫孰無子克肖豈多亦孰無孫克紹幾何遵矩率規顯

顯不忘爰方啓行輪仆軫亡嗚呼挺也寧知吾傷約其平生以志於墓以勵厥後俾承厥度

河南道監察御史康孟嘉墓誌銘

正統七年河南道監察御史康榮孟嘉奉使廣東明年秋使事畢將歸得熱疾布政使南昌彭公按察使蕪湖郭公合三司寮屬遍求醫療竟不起九月三日也發其裝蕭然遂相與治棺斂且歸其喪孟嘉吉之泰和人其先見余所作康氏譜孟嘉自少勤學雖貧志操卓然宣

德中舉賢良為廣西按察知事持其言行不肯苟且而勤於職務按察使謝瑾及其寮佐皆一時之賢者亦皆賢孟嘉瑾嘗語人吾輩以友道待孟嘉未嘗以屬而孟嘉事其上官皆謹凡所施於下吏者亦咸見敬愛三載考最刑部尚書匡南魏公前未嘗識孟嘉採諸輿論薦為監察御史益明法意究大體用刑能恕而致勤夙夜操行益嚴不肯枉道徇物嘗巡按浙江歲餘君子稱其嚴而不察公而有禮得憲體之正孟嘉在察院處其同

寮相好無間言獨都御史陳智怙勢騁私昵邪讐正凡其屬之正直者及為正直大臣所舉者智皆惡其不阿徇已而不禮遇之或導孟嘉盡少枉以取容乎孟嘉曰彼所為若是將不自容何能容人無幾智及其所素昵者皆以罪罷黜如孟嘉言孟嘉為人和厚坦易廉潔公正與物無競其卒也士君子皆為之嗟悼其享年四十有八孟嘉余女弟之子十二三從余在兩京二十餘年自束髮聞一善言輒服膺之不混儕流俗今卓立如此

余方資賢甥以終老豈謂溘先吾而逝也嗚呼惜哉其配羅氏子男一詡女四長者有歸餘未行孟嘉之葬以卒之明年某月某日銘曰

公其所存端其所履不亟不徐以綱以紀嗚呼孟嘉蓋棺事已舅氏之銘庶其不死

東里老人自志

東里在邑東清溪之上吾高曾以來居之楊氏宋盛際自吉水徙泰和號儒宦家蓋四百年矣稱東里者重所

自云高祖考復圭元贈富州尹騎都尉弘農郡伯妣黃氏贈弘農郡君曾祖考景行延祐初科進士累官翰林待制朝列大夫妣嚴氏弘農郡君繼高氏祖考公榮妣胡氏考子將妣陳氏國朝累贈三代考皆至光祿大夫柱國少師兵部尚書兼華蓋殿大學士妣皆夫人吾名寓字士奇後以字徵一歲而孤陳夫人鞠之教之既壯起家文學除吳王府審理副改翰林編修陞侍講又四轉至左春坊左諭德翰林學士又五轉至少傅兵部尚

書兼華蓋殿大學士遂進少師繇承事郎累轉至光祿
大夫柱國歷事四聖皆居清密越自授官所覲行道心
存體國志在濟人惟理無窮盡而學殖未充事有甚難
而智慮弗逮故秩愈進而憂愈重寵愈厚而畏愈切進
慕陳善退勤省躬而施以公而守以約始終一意夙夜
不忘若蒙負乘之譏昧止足之義皓首徒弊毫末無稱
反思惕然內愧何已風燭奄及幸保歸全輒循杜牧之
故事聊述平生用藏幽室亦以示於子孫

闕

生世八十

年叨祿於朝四十有四年去世以正統九年三月十四
日无娶嚴繼郭皆封夫人子三男四女孫男七白雲原
吾所治也寔以是年十二月二十日虛其右以俟郭銘
曰

昔也其浮今也其休曠八極兮逍遙聊委蛻兮茲丘

故太常寺贊禮郎嚴紹陵墓誌銘

永樂丙申春三月壬子太常寺贊禮郎嚴紹陵卒其從
孫鄉貢進士素以其喪歸葬撫之金谿先事奉紹陵所

自述世次行事來請銘春坊吳中允仲平翰林周編修
孟簡助為之請按嚴氏出漢處士光之後其始居金谿
西林者至紹陵十一世曾祖諱仲建祖諱禮用黃州通
判考諱忝中母陳氏紹陵諱師尹自幼簡重寡欲好學
問未冠喪其父母獨外兄陳繼善異視之語之曰子非
塵俗人言契紹陵意遂以入忝珠觀為道士師事王冲
道鄧伯舟授以玄奧日駸駸有造詣洪武己未郡縣以
部符選充樂舞生送京師居神樂觀十餘年其自治益

嚴而玄學益進數奉命代祀古帝王及名山大川擢太常寺贊禮郎階將仕郎陞登仕郎歲有事於天地宗廟百神紹陵既熟於禮典而嚴恭對越進退周旋執事有恪見重於時累署太常典簿以勤慎稱尤為真人張宇初所知嘗作釣雪圖況之因號釣雪翁在官幾三十年雖孜孜職闕而其中心泊然不累於物固游乎方之外也篤於宗族先世有祭田歸他姓竭貲贖歸授族人之賢者俾供歲祀察素有秀質曰此可以承吾宗取教育

之又遣從學明經師數歲素舉鄉貢進士故今主其喪
皆素也紹陵卒年六十有五葬以卒之歲某月某日銘
曰

澹乎其外冲乎其內湛乎立於神明之庭超乎樂於希
夷之際六十五年電邁焱馳又百千年復來歸哉

東里續集卷三十九